

secutionem effectus loco eius quae deficit, vel ne altera deficiat; sicut videmus quod omnia singularia unius speciei sunt corruptibilia, et tamen per successionem unius ad alterum potest in eis salvari perpetuitas speciei, Divina providentia taliter gubernante, quod non omnia deficiant; et hoc modo est in praedestinatione. Liberum enim arbitrium deficere potest a salute, tamen in eo quem Deus praedestinat, tot alia adminicula preparat, quod vel non cadat, vel si cadat, quod resurgat, sicut exhortationes et suffragia orationum, donum gratiae et alia huiusmodi, quibus Deus adminiculatur homini ad salutem. Si ergo consideremus salutem respectu causae proximae, scilicet liberi arbitrii, non habet certitudinem, sed contingentiam. Respectu autem causae primae, quae est praedestinationis, habet certitudinem.<sup>4</sup>

Haec explicatio pugnat cum doctrina Thomistarum, qui singulas gratias efficaces ob suae proprietatem naturae carere posse effectu negant, quum S. Thomas quolibet gratiae auxilium inefficax esse posse doceat. Quam autem ille explicacionem adhibuit, eam cum Molinae doctrina convenire evidens est; est enim haec explicatio ipsius S. Doctoris sententia. Itaque infallibilitatem praedestinationis inniti S. Thomas dicit in gratiarum multitudine („concerus causarum [adminiculorum] deficere possibilium“), quae suapte natura incertae, tamen ita sunt innumerabiles, ut, quo altera carerit effectu, eum altera consequatur, certusque denique eventus atque exitus evadat. Item Molina infallibilitatem praedestinationis et cuiuslibet gratiae efficacis repetit a multitudine subsidiorum gratiae et conditionum multiplicitate, quam tantam in promptu habeat opulentissima potentia Divina, ut vel haec vel illa, si detur naturae creatae, effectum certissime sit consequentia.

Diffr. Molinae sententia a S. Thoma hoc primum, quod hic de totius vitae cuiusque omniisque copia gratiarum collatarum, ille de singulis gratiis efficacibus loquitur; deinde quod S. Thomas scientiam medium non nominatim posuit, ut ille. Sed singularium quoque gratiarum certissimam efficaciam non tacuit S. Thomas (II. II. q. 24. a. 11.); de scientia autem ridiculum sit, si quis S. Thomam docuisse opinetur, tamdiu tentari a Deo omnem gratiarum varietatem, dum congruentem praedestinatis nanciscatur; necesse est enim ante a Deo certissima cognitione intelligi, quae cuique copia gratiae comparanda sit, ut praedestinati infallibiliter salvi fiant. Quae scientia nec est *visionis*, quae consequitur gratiae praedefinitionem, nec *simplicis intelligentiae*, qua fructum

defectibilis gratiae possilitas, non eventus praenoscitur. Scientia est igitur rerum aliqua conditione futurarum, cuius identidem mentionem infert S. Thomas. Et re vera cum S. Augustino *praescientiam* praemittit *praeparationi* earum gratiarum, quibus praedestinati certissime salvi futuri sint (de ver. q. 6. a. 3.).

Videamus nunc alias locos, quibus S. Doctor ad explicandam Dei providentiam et praedestinationem scientiae mediae mentionem facit.

Tribus enim locis diversis (1. dist. 41. art. 3. ad 1; de ver. q. 6. a. 2. ad 7; I. q. 23. a. 5. ad 1.) contra suam de praedestinatione doctrinam vel glossam ad Rom. 9, 15., quae Ambrosio tribuitur, vel similem Origenis locum obiicit. In illa Deus ita loquens inducit: „Misericordiam illi dabo, quem scio post errorum toto corde reversurum ad me: hoc est dare illi cui dandum, et non dare illi, cui non dandum est, ut eum vocet, quem sciat obediere, illum vero non, quem sciat non obediere.“ Quae verba de scientia media intelligenda esse manifestum est; ponitur enim praescientia eius liberum actus, qui a conditione pendeat: si Deus vocet quemquam, utrum sit obsecrurus neeme; deinde illa praescientia ad explicandam praeparationem gratiarum adhibetur, quod certum indicium esse intelligi scientiam medium supra (p. 31) declaravimus. Quid igitur S. Thomas? Num huiusmodi praescientiam aut esse negat aut isto modo adhiberi posse? Minime vero. Negat *merita* esse opera ita praevisa, quibus Deus ad praedestinationem moveatur; dicit finem esse vel dispositionem, ob quae Deus decernat gratias largiri, quamquam omnino tenet, non eiusmodi actus, sed solam bonitatem Dei causam rationemque esse, qua ad gratias conferendas moveatur. „In illis verbis Ambrosii“, inquit 1. dist. 41. art. 3. ad 1., „non designatur, quod opus nostrum sit causa voluntatis Divinae, neque etiam, quod sit causa ipsius dationis gratiae, sed solum dispositio quedam. Illi enim Deus proponit gratiam infundere, quem praescit se ad gratiam praeparaturum, non tamen propter praeparationem . . ., sed propter bonitatem suam.“ Item de ver. q. 6. a. 2. ad 7: „Propositum cordis Iacob *praescitum* a Deo non fuit causa, quare ei gratiam dare voluit, sed fuit quoddam bonum, ad quod Deus gratiam dandum ordinavit; et ideo dicitur, quod ex proposito cordis, *quod ei patuit*, eum dilexit; quia sc. ad hoc eum dilexit, ut tale propositum cordis haberet, vel quia *praevidit*, quod propositum cordis eius fuit ad gratiae susceptionem dispositio;“ et I. q. 23. a. 5. ad 1.: „Usus gratiae *praescitus* non est ratio collationis,“ Schnoermann, Controvers.

tionis gratiae nisi secundum rationem causae finalis.<sup>4</sup> Finis est igitur largitionis gratiae usus bonus a Deo scientia media praevius.

Paulum progrediamur. Si Divinae providentiae et praedestinationis infallibilitas esse non potest, quin praecesserit scientia media, in haec illam inniti evidens est. In qua una re maxime tota controversia vertitur (v. supra p. 8.). Sed illud S. Thomas etiam aperte infert ex iis, quae dixerat. Docet quidem de ver. q. 6. art. 3.: *certitudinem praedestinationis addere supra certitudinem praescientiae certitudinem ordinis*, sed id non prohibet, quoniam haec quoque ab illa sit. Ita notio familiae aliquid addit parentibus; complectitur enim liberos, qui sunt de familia. Nec vero ideo liberi non sunt a parentibus. Similiter in haec re, de qua agimus, dicendum est dicisque ipse eodem loco (ante corp. art.): *Praedestinatio, inquit, includit praescientiam; sed praescientia habet certitudinem, ergo et praedestinatio.*

A praescientia igitur certitudinem praedestinationis derivat. Neque contrarium est, quod candem alibi a supremo dominatione atque omnipotenti Dei repetere videtur. Ut I. 3. contr. Gent. c. 94. certitudinem providentiae ex hoc explicat, *quod omnia illi subdantur*; sed ibidem antecedere docet intellectus deliberationem ordinisque convenientis inventionem; quid igitur negat ex huius ordinis certitudine providentiae infallibilitatem derivari? Nos quodque defendimus, Deum ob supremam dominationem et potentiam efficere posse in liberis voluntatis, quidquid velit. Id quomodo explicandum sit, quaeritur. Diverse enim omnipotentiam operatur, aliter creatione, aliter gratia efficaci, ut contra Quesniam Ecclesiae definitiv. Dicimus igitur: ideo illud posse Omnipotentem, quod in infinitis thesauris suis innumerabilia habeat instrumenta movenda voluntatis, e quibus scientia media eligit ea, que effectu caritura non esse certissime praevideat. Aliquam cognitionem praecedere omnipotentiam necesse est, quia ignorata nemo concupiscit. Iam Bannesiani solam intelligentiam rerum possibilium etiam in movenda libera voluntate praecedere volunt; nos praeterea scientiam medium postulamus. Nec haec nec illa de dignitate Divinae potentiae derogat; nam re idem est praescientia et omnipotentia, quae si scientia media eget, nulla tamen re aliena caret, sed in se ipsa, quidquid ad consilia sua exsequenda desiderat, complectitur. Nihilo securi quaeri convenit, infallibilitas omnipotentiae in movenda voluntate libera et praescientia pendent an contra infallibilitas praescientiae ex omnipotentia. Ad quam quaestionemclare ac dilucide S. Thomas 1. dist. 38. q. 1. art. 5.

respondet, ubi accurate disserit, quomodo Dei scientia cum actu contingentia concilianda sit. Ducas proponit difficultates: 1. quum scientia Divina sit causa omnium effectuum rerum creatarum, sit autem ipsa necessaria et immutabilis, eam non videri posse efficere contingentia (quae non sint necessaria possintque non esse); 2. scientiam Dei non esse nisi veri; veritatem autem scientiae pugnare cum incerta veritate rerum. De priore difficultate in commentatione nostra (p. 56. 62.) respondentem audivimus. Scientiam Divinam esse causam exemplarem rerum creatarum earumque effectuum, voluntatem causam efficientem. Ut solis virtute inexhausta non impeditur, quominus aliqua semina nec enascantur nec adolescent, ita causa prima operante fieri potest, ut effectus creati deficient. Ad alteram transiens difficultatem, ut infallibilis scientiae Divinæ concessionem cum incerto rerum eventu declarat, ab ea ratione orditur, qua everti recentiorem Thomismum necesse sit: „Non potest esse,” inquit, „quod Deus sciat simul hunc cursum, et iste deficit a cursu, et hoc est propter certitudinem scientiae et non propter causalitatem eius.” Iam vero quoniam certa cognitio non sit nisi rerum certarum, contingentia quoniam sint certa, inquirit. Sunt quae plerumque evenire soleant et ex causa suis aliqua nec tamen certissima cognitione concludi possint. Alia, quae sint „contingentia ad utrumlibet, in causa suis nullo modo cognosci possunt”. Sed tum, quum fiunt actus liberi, certissime veri sunt; quum enim currit Socrates, ut simul non currat, fieri prorsus non potest. Atqui contingentia Deus non modo ut in causa continentur, verum etiam ut fiunt atque sunt, cognoscuntur<sup>1</sup>. Haec autem ipsa Societatis doctrina est, cui Bañez tria docet contraria.

<sup>1</sup> Quam doctrinam S. Thomas in *Somma* iisdem ferme verbis repetit. „Quicunque,” inquit, „cognoscit effectum contingentem in causa tantum, non habet de eo nisi conjecturalem cognitionem. Deus autem cognoscit omnia contingentia non solum prout sunt in suis causis, sed etiam prout unumquodque eorum est actus in se ipso” (I. q. 14. a. 13). Bañez ut demonstrat actus liberos ex solis causis certe cognosci posse, ad priorem partem enuntiationis provocat. „Tertia conclusio. Deus cognoscit futura contingentia in suis causis, sed determinatis et completis. Primam partem conclusionis docet aperte D. Thom. in littera, dum inquit: Cognoscit autem Deus contingentia non solum in suis causis etc.” Deinde paulo post: „Itaque etiam si Deus,” inquit, „cognoscet futura contingentia . . . solum in causis ipsorum, eius cognitione esset certa et infallibili.” Antea quoque idem illis S. Thomas verbis probari posse significaverat: „Iste sensus etiam potest colligi ex S. Thoma ex eo, quod dicit in hoc articulo, Deum cognoscere futura contingentia non solum in suis

Nam *primum* S. Thomas affirmat, Bañez negat, motionem Divinam in rebus creatis modificari et saepe effectu frustrari; de qua re supra (pag. 56 ss.) dictum est.

Quam discrepantiam *altera* consequitur, quum queratur, utrum ex ipsa efficientia Divinae virtutis an ex certissima Dei cognitione proxime derivetur necessitas eventus a Deo praevisi. S. Thomas dicit (l. c.): „Non enim potest esse, quod Deus sciat simul hunc cursurum, et iste deficit a cursu, et hoc est propter certitudinem scientiae et non propter causalitatem eius.“ Cum quo consentit Caetanus: „Quoad hoc: res sciatae relatae ad scientiam Dei sunt necessariae, nihil obstat proposito, quoniam non est ibi sermo de rebus scitis relatis ad Dei scientiam ut causam, sed ut scientiam“ (ad I. q. 14. art. 13.). Contra Bañez: „Oporet deinceps explicemus necessitatem, quam habet [consequens: Antichristus erit] in ordine ad eandem [Dei] scientiam ut causa est. Et ista necessitas sumitur ex efficacissima primae cause virtute, quae ita determinat omnes causas secundas ad suos effectus producendas, quod nulla causa secunda potest exire ab eius determina-

*causis etc.* (In I. q. 14. a. 13. p. 206. et 207.) Id quidem detorquere est ac depravare illius sententiam. Dixisset enim S. Doctor uno verborum tenore: qui contingens „in causa tantum“ cognoscet, cum non habere nisi „coniecturalē cognitionem“, et tamen Deum, si cognoscet in causa tantum, certo et infallibiliter cognitione esse. Recte autem Caetanus illud sic interpretatur: „Contingentia futura cognoscuntur a Deo prout sunt actu in se ipsis et prout sunt in suis causis, sed primo modo certe, secundo modo vero prout sunt cognoscibilis.“ Ferrariensis quoque a se dissidente Bañez (l. c.) fatetur: „Dicit secundo Ferrariensi: Futura contingenta secundi generis [libera] nullo modo possunt cognosci certo et infallibiliter in suis causis.“ Nec quidquam proficit, quum I. contr. Gent. c. 67. n. 3. appellat, ubi dicit S. Thomas, contingens ex causa „completa, si non impeditur“, cognosci posse. Quae verba ut ad hanc controversiam recte traducantur, videndum est, quibus rebus voluntatem impediendi dicat, quoniam agat. Docet autem perpetuo liberam voluntatem suo arbitratu et determinari ad agendum et ab eo prohiberi. Id igitur nisi etiam comprehendatur, non dicit actum liberum ex causa sua cognosci posse. Consentit igitur ille locus cum ceteris, quibus negat ex solis causis actum liberum cognosci posse. Exemplum possumus, cum intima controversia conexum, quo ratio interpretationis Neo-Thomisticae quasi sub oculos subicieatur. Dimidiat sententia deceptur, et ne proxima quidem verba superiora attenduntur, nedum reliqui S. Doctoris libri magnique eius interpres adhibeantur. Sed, ut infra dicemus, ita Bañez cum S. Thomas, ut Protestantes cum Scriptura, Bañez cum Augustino agit (cf. p. 30). Catholica interpretatio est non singula separatum verba, sed coniuncta cum reliqua doctrina considerare, et theologicae explicationis perpetuitate atque doctrinae amplificatione constanti ad superiores scriptores intelligendos utitur.

tione“ (In I. q. 14. a. 13. p. 216.). Negat S. Thomas scientiam Divinam ut causam infallibilitatem efficeret contingentium; eventus enim praevisi necessitatem dicit a praescientiae causalitate minime derivari. Contra censem Bañez, dissenserit tanto magis manifesto, quod ille rem omnino indifferentem ponit (cursum Socratis), hic *virum peccati* inducit („Antichristus erit“), qui summa flagitia patraturus est; cuius rei necessarius eventus ex efficacissima virtute Divina omnipotentiae effectus omnium causarum determinantis derivatur!

Sequitur *tertia* discrepancia. S. Thomas dixit, liberas actiones *nullo modo* e causis certo cognosci posse; intellexit autem hic causas a Deo motas, quia 1. nisi illa motione excite efficeret nihil omnino possunt, nec 2. illa motione tollitur ratio, ob quam actus liberos negavit ex suis causis ullo modo cognosci posse, h. e. contingentia ad utrumlibet. At Bañez omnino affirmit actus liberos futuros a Deo e causis certo cognosci, quod eas ipse moverit.

Quae quum ita sint, consequi scientiam medium e S. Thomae doctrina fatendum est, et si eam ipso minus perspicue atque aperte proposit. Et sine ulla dubitatione Caetanus aliquę veteres Thomistae concesserunt, illum de praescientia iisque quaestionibus, quae cum ea connexae sint, obscurius locutum esse. Fuit igitur locus illi incremento atque amplificationi theologiae, quae in Vaticano proponitur, in qua Societas Iesu elaboravit. Quam *noram*, at *constantem* doctrinam S. Doctoris explicationem quum Bañez repudiaret, coactus est, illas ipsas sententias negare, unde rectae rationis conclusio deducta erat. Conclusiones novas dum recusat, ipsa capita doctrinae S. Thomae coepit impugnare.

## II. Nusquam S. Thomas physicam determinationem docuit.

I. Nullus est locus, ubi S. Doctor voluntatem a Deo ad liberos actus proxime praedeterminari aut etiam determinari dixerit. Id supra demonstravimus (p. 70 ss.).

Dixerit quispiam, physicam praedeterminationem a S. Thoma non his ipsis verbis proponi, sed inclusam atque comprehensam aliis doctrinis, quas necessario consequatur. Audiamus Billuartum, qui id genus argumenta breviter apteque composuit. E quibus tamen unum, quod a potentialitate atque indifference voluntatis sumitur, supra (p. 64. 72.) examinavimus. Item ostendimus, S. Thomam, quum Deum voluntatem et natura et gratia phisice

praemovere docet, nondum physicam Bannessii praedeterminationem affirmare. Sic igitur argumentatur Billuart.

1. „De ratione primae causae,“ inquit, „et primi motoris est, ut alias causas moveat et nulla ex iis moveatur nisi mota a prima... Atqui in systemate scientiae mediae causa secunda se movet non mota a prima, se enim determinat non determinata a Deo.“ De scientia med. art. 6. §. 6. Non possumus non summopere mirari, ab illo Thomista universe pronuntiari atque ad voluntatem transferri, quod S. Thomas in *solas* res non liberas cadere, ut opponantur voluntati, clarissime dicit. Nam *Creaturam rationalem*, inquit, *Deus ordinat ad agendum voluntarie et per se, sed aliae creaturae non agunt nisi motae ex operatione Divina* (I. q. 19. a. 12. ad 3.). Quod non est sibi causa agendi, non est liberum in *agendo*; *quaecumque autem non moventur neque agunt nisi ab aliis mota, non sunt sibi ipsis causa agendi* (2. contra gent. c. 48.). Haec est enim illius doctrina: voluntatem et a Deo et a seipso moveri, ab illo primum excitari ad actum indeliberatum, ut deinde ipsa se determinet ad liberos. Atque haec tenus illud Billuarti recte dicitur; sed ita Bannesianos nihil iuvat.

2. Sed audiatur iterum. Dicit necessitatem atque efficaciam gratiae a S. Thoma ex motione Divina explicari; eam porro efficacem non esse motu creaturae, sed supte natura. Hoc alterum distinguendum est. Nam si hoc intelligit, motionem Divinam sua virtute efficere, quidquid efficiat, vere dicit; at id nemo negat; nemo enim gratiam suam vim a voluntate accipere arbitratur. Sin illud intelligit, effectus infallibilem veritatem a sola esse interna virtute motionis Divinae, id quidem (nec de alia re hie quaerimus) a S. Thoma constanter negatur. Qui etiam atque etiam dicit, si quaeratur, certene secentrus sit effectus an possit deficere, rationem habendam esse non solius virtutis Divinæ motionis, sed etiam conditionis habitusque naturae creatae. „Quamvis causa prima,“ inquit, „vehementius influat quam secunda, tamen effectus non completur, nisi adveniente operatione secundae; et ideo si sit possibilitas ad deficiendum in causa secunda, est etiam eadem possibilitas deficiendi in effectu, quamvis causa prima deficere non possit... quia ergo ad esse effectus requiriatur utraque causa, utriusque defectus inducit defectum in effectu“ (q. 2. de verit. art. 14. ad 5.). Item *de malo* q. 6. art. 1. ad 15., ut liberam esse voluntatem probet, quamquam non possit a potentia transire ad actum nisi ducta ab alia causa (motione Divina): „Sic ergo illa causa,“ inquit, „quae facit voluntatem aliquid velle,

non oportet, quod ex necessitate hoc faciat, quia potest *per ipsam voluntatem impedimentum praestari*.“ Falsum est igitur effectus infallibilitatem a sola virtute Divinæ motionis repetendam esse.

3. Redeamus ad Billuartum. Ut ostendat, Deum efficere non solum agendi *potestatem* [*gratia excitanti*, qualem Bannesiani intelligunt], sed ipsum etiam actum voluntatis [*praedeterminatione physica*], praeter cetera in diss. 5. art. 6. de grat. efficaci, explanationem D. Thomae appellat epistolae ad Ephesios cap. 3. lect. 2.: „Facultatem autem dat Deus infundendo virtutem et gratiam, per quas efficiunt homo potens et aptus ad operandum; sed ipsam operationem confert, in quantum operatur in nobis interior movendo et instigando ad bonum.“ At *virtutem et gratiam* S. Thomas, ut manifestum est, gratiam sanctificante virtutesque ei adiunctas intelligit, quibus fit homo aptus ac potens ad operandum; *interius autem moveri et instigari* dicitur gratia excitanti. Id ipsa verba sonant; *infundi enim habitus dicitur, et instigare*, quum sit idem proorsus atque excitare, gratiam excitantem significat. Argumento esse potest similis locus ex eodem commentario (cap. 2. lect. 3.), ubi ipsa adiecta est vox *habitus*: „*Ulterius*,“ inquit, „non solum datur nobis *habitus* virtutis et gratiae, sed interius per spiritum renovamur *ad bene operandum*. Unde subdit: *in operibus bonis*, quia scilicet ipsa bona opera sunt nobis a Deo.“ Falsissimum est igitur, quod superiore loco Billuart gratiam et virtutem intelligit gratiam sufficientem; immo S. Thomas *habitum* gratiae sanctificantis facultatem conferre docet agendi, instigationem vero, h. e. gratiam excitantem efficiere actum. Quod praedclare congruit cum illa regula, quam supra posuimus: „*Illiud, in eius virtute agens agit, est causa non solum virtutis, sed etiam actus*.“ Nam voluntas, quia gratia excitantia a Deo data ad agendum movetur et instigatur, sese ipsa ad actus supernaturales determinat; quo fit, ut hi ipsi S. Doctoris sententia ad Deum auctorem necessario referantur, idque eo magis, quod illius gratiae effectum certissimum et praevidit Deus et voluit. Qua ratione diluntur, quaecumque Bannesiani e plurimis S. Thomae locis concludunt, ubi ille et posse et agere, et gratiam et usum gratiae a Deo esse docet.

4. Idem Billuart in Diss. VIII. art. 5. § 3. Mens S. Thomae, vol. I. 331. ad hanc illius doctrinam provocat: voluntate Dei effici non solum, ut sine res omnes atque actiones, verum etiam, ut tales i. e. vel contingentes vel necessariae sint. Recte omnino; at ipsius S. Thomae explicatione refutatur atque evertitur inter-

pretatio Bannesianorum. Nam idcirco dicit ille Deum esse auctorem effectuum contingentium, quod ad eos elicendos ius utatur causa, quae possint effectu carere. (Lect. 14. l. 1. Peri hermeneias.) „Voluntas Divina est intelligenda ut extra ordinem entium existens, velut causa quaedam profundens totum ens et omnes eius differentias. Sunt autem differentiae entis possibile et necessarium; et ideo ex ipsa voluntate divina originantur necessitas et contingentia in rebus, et distinctio utriusque secundum rationem proximarum causarum. Ad effectus enim, quos voluit necessarios esse, dispositus causas necessarias; ad effectus autem, quos voluit esse contingentes, ordinavit causas contingentes agentes, id est, potentes deficere.“ (Lect. 3. l. 12. Metaphys.) „Ens, in quantum ens est, habet causam ipsum Deum; unde sicut Divinae providentiae subditur ipsum ens, ita etiam omnia accidentia entis, in quantum est ens, inter quae sunt necessarium et contingens. Ad Divinam igitur providentiam pertinet non solum quod faciat hoc ens, sed quod det ei contingentiam vel necessitatem. Secundum enim quod uniuersique dare voluit contingentiam vel necessitatem, praeparavit ei causas medias, ex quibus de necessitate sequatur, vel contingenter.“ Idem dicit, ubi de praedestinatione agit, Quodlib. XII. art. 3.: „Voluntas Dei est principium totius entis; ergo non cadit sub ratione contingentiae vel necessitatis, sed hacc effluunt et ordinantur ex Dei voluntate, et sic ipsa Dei voluntas facit quaedam contingentia, praeparando causas contingentes illis rebus, quas vult esse contingentes, et similiter necessarias causas rebus et effectibus necessariis.“ Quam sententiam fuisse S. Thomae perpetuam, ille ostendit locus (l. q. 19. a. 8), unde Bannesiani probare conantur, gratiae infallibilem efficaciam ab invicta vi voluntatis repetendam esse: „Cum igitur voluntas Divina sit efficacissima, non solum sequitur quod fiant ea, que Deus vult fieri, sed et quod eo modo fiant, quo Deus ea fieri vult. Vult autem quaedam fieri Deus necessario, quaedam contingenter; ut sit ordo in rebus, ad complementum universi. Et ideo, quibusdam effectibus aptavit causas necessarias, quae deficere non possunt, ex quibus effectus de necessitate proveniunt; quibusdam autem aptavit causas contingentes defectibiles, ex quibus effectus contingenter eveniunt.“

Ergo idcirco Deus dicitur a S. Thoma causa effectuum contingentiae, quia ad eos efficiendos causis natura incertis (deficere potentibus, defectibilibus) utatur. In quibus causis *gratia efficax* est, immo vero, si Bannesianos audias, ea adaequata est causa

operationis liberae supernaturalis; ergo ita demum contingentiam sive libertatem illius operationis conservabit, si ipsa per se esse sit anceps atque incerta ad effectus veritatem. Hoc ipsum Jesuitae aiunt, negant Bannesiani<sup>4</sup>. Confirmat conclusionem nostram Billuart. Quaevers enim, unde sit infallibilis efficacia consiliorum Divinorum de liberis actionibus nostris (diss. 8. a. 3. § 5.), aliquot verba e tribus locis a nobis allatis quum decerpssisset, hanc ponit obiectionem Molinistarum: S. Thomas post ipsum illum Summae locum Deum dicere, non per se, sed praeparandis causis, quae deficere possint, effectus creatos contingentes operari. Respondebat dnos alteros afferens locos ex narratione 1. Perihermen. et 6. Metaph. „Iuxta S. Thomam,“ inquit, „citatum 1. Periherm. et 6. Metaph., sic Deus est causa contingentiae et libertatis, sicut est causa entis; atque est causa entis non solum mediante virtute creata, quam produxit, sed immediate in se: ergo.“ Hoc ergo inepte subiungitur. Quae enim arguendi utilitas ibi est, ubi, quid censeat, auctor ipse quam maxime perspicue enuntiat? Annon his duobus locis prorsus dicit idem, quod in Summa, hoc est, Deum rerum contingentiam efficiere praeparandis causis deficientibus? Hoc cur tacetur, ut contorta conclusiuncula sententia contraria conficiatur? Nec vero alterutro loco docet ille, quod vult Billuart, sic Deum esse causam contingentiae, sicut entis, i. e. *eodem prorsus modo effectorem esse contingentiae atque entis*. Dicit omnino: „Sicut Divinae providentiae subditur ipsum ens, ita etiam omnia accidentia.“ Sed illa prioris sententiae *sicut . . . ita etiam* idem significant, quod in conclusione subiuncta non solum . . . sed (h. e. *et esse et modos entis pariter subiecti Divinae providentiae*). Usitatissimum est ita poni „sicut . . . ita etiam“, quibus prorsus idem eademque rationem significari minime necesse est. Quae iniuria premit Billuart eaque tanto maiore, quod ipsam proximam praeterit sententiam, qua contrarium enuntiatur. De qua tota re lenissime indicaverit, qui alium aliquem Thomistam a Billuarto exscriptum dixerit.

5. Evidens Billuart argumentum derivare sibi videtur ex illa a S. Thoma affirmata infallibilitate motionis Divinæ: *nihil argentius, nihil clarius*. Qui loci si sunt evidentes, non Bannesianorum

<sup>4</sup> Concedunt Thomistae gratiam etiam efficacem, si separatim spectetur, carere posse effectus; sed quum ut integra causa effectrix actionis consideratur, non separatim spectanda est, sed coniuncta illi quam propriam habet derivatam a Divina omnipotentia virtuti, atque ita sine effectu esse non potest.

sentientiam probant, sed omnia ei contraria. Primo loco ab illo (Diss. V. art. 6. de gratia efficaci) assertur I. II. q. 10. a. 4. ad 3.: „Si Deus movet voluntatem ad aliquid, incompossibile est huic positioni, quod voluntas ad illud non moveatur; non est tamen impossibile simpliciter.“ Quid tandem haec verba probant? „Impossibile simpliciter“ et „impossibile ex aliqua positione“ quid sibi volunt? Respondeat auctor ipse S. Thomas. Lect. 15. in libr. I. Perihermeneias et lect. 15. in libr. II. Physicorum exponit, nihil aliud esse necessarium vel impossibile ex suppositione nisi hoc: *Si est, impossibile est illud simul non esse.* Necessarium simpliciter esse id, cuius necessitas *e causa praecedenti* apta sit; id igitur quod ex causa *efficienti* necessario consequatur, necessarium esse simpliciter. Hoc ad superiorem locum transferatur. Si non moveri voluntas non potest idea, quod, quum est in motu, carere motu non potest — quemadmodum Jesuitae docent —, necessitas est ex suppositione; sin vi propria naturaque ipsa causae efficientis efficitur, ut non actu moveri voluntas non possit — atque sic moveretur praedeterminatione physica —, tum denum actus necessarius est simpliciter. Nam vero necessarium esse simpliciter, quod illa Dei motio efficiat, prorsus negat S. Thomas. Occupavit igitur ac refutavit interpretationem Bannesianorum; cum eoque Molinistae optime consentiant, id quod amplius demonstrabunt ea, quae de praescientia ab illo disputata postea afferemus.

Sed quum argumentamur, *necessitatem ex prioribus* esse absolutam, Billuart illud e Summa obiicit (I. q. 19. art. 8. ad 3.), ubi S. Thomas rationem a se ante generatim propositam ipse circumscribere videtur: „Ad tertium dicendum, quod posteriora [res creatae] habent necessitatem ex prioribus [voluntate Divina] secundum modum priorum. Unde et ea, quae sunt a voluntate Divina, talem necessitatem habent, qualis vult Deus ea habere, scilicet vel absolutam vel conditionalem tantum, et sic non omnia sunt necessaria absolute.“ Sic igitur illud circumscribit, ut Deus, quum sit *causa prior*, tamen pro arbitrio vel voluntate necessitatem efficiat vel contingentiam ac necessitatem ex suppositione. Rursum igitur ad illam quaestionem deducimur, quomodo Deus causa sit necessitatis et contingentiae. Ad quam, uti ostendimus, constantissime sic ille respondet: contingentia Deus efficit causis defectibilibus, necessaria indefectibilibus. Physica autem praedeterminatio quam sit in his alteris, necessitatem efficit absolutam.

Alter locus est, quo utitur Billuart: „Deus movet voluntatem immutabiliter propter efficaciam virtutis moventis, quae deficere non potest; sed propter naturam voluntatis motae, quae indifferenter se habet ad diversa, non inducitur necessitas, sed manet libertas; sicut etiam in omnibus providentia Divina infallibiliter operatur, et tamen a causis contingentibus proveniunt effectus contingentes, in quantum Deus omnia movet proportionabiliter, unumquodque secundum suum modum.“ Q. 6. de malo a. unico ad 3. Dicit igitur S. Thomas: Ut certa efficacia Divinae providentiae cum contingentia effectuum creatorum, ita immutabilis atque inexhausta vis motionis Divinae conciliatur cum humanae actionis libertate. Quod ita demum doctrinam probat Bannesianum, si actus libertatis, ad quem Deus movet, ob solam vim ac naturam motionis Divinae non fieri non posse intelligitur. Id num S. Thomas docet? De quanam motione Divina in corpore articuli disserit? Primum actum voluntatis, ad quem reducantur ceteri omnes, a Deo esse ostendit; sed semel excitata motus que voluntatem eo ipso motu se ad alios actus liberos transferre posse: *Per hoc, inquit, quod homo aliquid vult in actu, movet se ad volendum aliquid aliud in actu.* Haec illa doctrina est, quam esse Doctoris angelici supra diximus: omnes actus liberos *e naturali appetitione finis ultimi*, quam Deus indidit naturae, fluere ac derivari. Quae motio immutabilis est nec unquam deficit; nec vero sequitur, ut voluntas libera actus, ad quos Deus illa motione allicit, omittere non possit. Quod ipsum paulo post (ad 15.) ipse S. Thomas monet: „Illa causa,“ inquit, „quaes facit voluntatem aliquid velle, non oportet, quod ex necessitate hoc faciat, quia potest per ipsam voluntatem impedimentum praestari.“ Clarius etiam illa sententia, quam p. 86. attulimus, De veritate q. 2. art. 14. ad 5., indefectibilitatem ac virtutem Divinae motionis cum omissione actuum creatorum confort atque componit. Falsum est igitur, S. Thomam illo loco motionem immutabilem physicam intelligere praedeterminationem; qua praesente fieri nullo modo potest, ut actus praedeterminatus omittatur. Denique etiam q. 22. de veritate a. 5. ad 7. peccator *deficere dicitur ab indeficiente inclinatione ad bonum*, i. e., deficere ab immutabili ac perpetua inclinatione ad finem ultimum; quae inclinatio paulo post (in corp. a. 6.) *determinatio immutabilis* appellatur. Unde fit manifestum, cum S. Thomas dicat *moveare immutabiliter*, naturalem appetitionem finis ultimi, non praedeterminationem intelligi. Ita quicunque pro physica praedeterminatione afferuntur loci non Bannesiani.

nam doctrinam demonstrant, sed eam, quae est illi omnino contraria. Alii sane loci proponuntur, quibus impugnetur scientia media. Quos ut accurate refutaremus, longius digredendum a re proposita esset. Videatur Annatus in „Scientia media contra novos eius impugnatores defensa“, qui Salmanticenses et Ioannem a S. Thoma confutat, et imprimis praeclarum Card. Franzelini opus „De Deo uno“.

Quod autem Billuart obiicit, in concilianda libertate cum decretis divinis S. Thomam non ut scientia media, id quidem si concesserimus, minime causae nostrae Oberit. Si ille aliquam questionem non perspicie ac plene solvit, nihil tamen fuit, quod amplificatis theologiae studiis posteriores prohiberet, quominus eandem questionem retractarent. Satis nobis est demonstrasse, rationibus S. Doctoris consentaneam eam doctrinam esse, quam amplectimur.

### III. S. Thomas negat id, quod Bannesiani docent.

Principio in memoriam revocanda sunt ea, quibus discrepare utrosque iam ostendimus; deinde alia quaedam significabimus.

1. Docebat ille, motionem primae causae causis creatis modificari; id Bannesiani negant.

2. Ille voluntatem a Deo ad ipsum actum liberum determinari non censem, hi censem.

3. Ille voluntatem a primo actu indeliberto nulla addita nova praevenientia Dei motione ad libere agendum sese movere dicit; non item Bannesiani, qui physicam praedeterminationem ad illud efficiendum requiri affirmant.

4. Si S. Thomam audias, voluntas motum a Deo impressum ad actum liberum vel applicare potest vel non applicare; inclinationem ad actum ita esse in liberi arbitrii potestate, ut non possit esse a Deo determinata. Quod hi negant.

5. Ille negat, hi aiunt, infallibiliter praescientiae Divinae ab ipsis virtute atque efficacia derivari.

6. Actus liberis apud illum *nullo modo* cognosci ex causis suis possunt; hi contra existimant.

7. Bannesianorum sententia *sola sufficiens*, non vero efficax gratia indelibera mentis illustratio motusque voluntatis est; efficax autem gratia ab his actibus diversa est ad eosque accedit.

S. Thomas gratiam actualem etiam efficacem eiusmodi actum animi esse perspicue docet. „Et hoc modo,“ inquit I. II. q. 110.

a. 2., „ipse gratuitus effectus in homine [gratia] non est qualitas, sed motus quidam animae; actus enim movens in moto est motus, ut dicitur 3. Phys. text. 18.“ Itaque Medina, amicus Bannessii atque collega, gratiam motionem *Divinae inspirationis* appellat (ad h. l.) idque ita certum esse indicat, ut demonstrandum non sit. Albeldae quoque O. Pr. Hispano, qui aequalis et ipse Bannessii fuit, haec doctrina *sub formalibus terminis* loco superiore S. Thomae enuntiari visa est ex eoque argumentum ducit, quo *Thomistas iuniores* (Bannesium eiusque discipulos) refutet. Ratioines affert a. ipsam S. Thomae loquendi consuetudinem: „D. Thomas semper *motus* appellat actus elicitos a voluntate, dividens illos in motus indelibertos et deliberatos;“ b. locum ex Aristotele iam allatum, quo *motus* dicitur actus; c. interpretationem veterum Thomistarum; d. ea, quae S. Thomas disserit in explanatione S. Ioannis, cap. 6. lect. 8. (Albeldae Comm. in I. p. Summae S. Th. disp. 58. sect. 2. nn. 7. 8., sect. 3. n. 11. Ed. Compl. 1621. pp. 690. 704.)

8. Distinguunt, ut dictum est, Bannesiani *sensum divisum et compositum*, ut carere necessitate praedeterminationem persuadeant: *potestatem* non agendi, non *ipsam omissionem* actus cum praedeterminatione consistere posse. Id qui S. Thomam sequetur, negabit. Non enim extra voluntatem, sed *in ea* est praedeterminationis; negat autem ille, si *insit* in ipso homine, quo agere prohibeatur, distinctionem sensus compositi et divisi adhiberi posse. Rationem evidentem affert: ut libertas salvetur, manere oportere potestatem in subiecto; si autem id, quod impedit actum, insit in subiecto, veram eiū efficiendi potestatem tolli.

Ipsum audiamus. De verit. q. 6. a. 3. ad 8. sic ait: „Ad octavum dicendum, quod nigredo et albedo sunt quaedam formae existentes in subiecto, quod dicitur album et nigrum, et ideo non potest aliiquid attribui subiecto nec secundum potentiam nec secundum actum, quod repugnat formae praedictae, quamdiu *in subiecto manet*.“ Idem argumentum e Summ. I. q. 14. art. 13. ad 3. deponit potest. Ibi obiectionem illam, praescientia vim ac necessitatem inferri homini, adhibita sensus divisi et compositi distinctione refutat; addit autem non solvi difficultatem „si hoc, quod dico scitur, importaret aliquam dispositionem subiecto *inhaerentem*.“

Confirmari argumentum potest duplaci ratione. S. Thomas constantissime sic loquitur, ut contingenter dicat ipsum actum, ac perspicue docet, actus contingentiam motione Divina non tolli

(I. II. q. 10. a. 4., alibi). At contingentem esse actum nihil est aliud nisi fieri posse ut actus non sit. Quod quidem distinctionem Bannesianam sensus compositi et divisi evertit, quum simul cum Divina motione esse in voluntate *potestatem* non agendi volunt, *at fieri nullo modo posse ut actus non sit*; postulat enim S. Thomas, ne libertas extingatur, ut ipse *actus* sit contingens sed non esse possit.

Idem porro sic scribit (Quodlibet. I. art. 7. ad 2.): „Ad secundum dicendum, quod Deus moveat omnia secundum modum eorum, et ideo Divina motio a quibusdam participatur cum necessitate, *a natura autem rationali cum libertate* propter hoc, quod virtus rationalis se habet ad opposita, et ideo sic Deus moveat mentem humanam ad bonum, quod tamen *potest huic motioni resistere*; et sic ex Deo est, ut homo se ad gratiam praeparet, sed quod gratia careat, non habet causam a Deo, sed ab homine, secundum illud Osee 13: „*Perditio tua ex te, Israel, tantummodo ex me auxilium tuum.*” Hoc loco S. Thomas *e natura libertatis humanae* concludit posse motioni Divinæ resisti, idque ita, ut *actu resistere* non repugnet naturæ Divinæ motionis; nam loquitur de potestate tali, quæ, quamvis homo a Deo moveatur, saepe in actu transeat, ita ut gratia Dei amittatur. Praedeterminatione igitur, quum propter eius naturam fieri non possit, ut ei actu resistatur, *naturæ repugnat libertatis humanae.* Haec S. Thomae sententia atque doctrina est.

9. Unde merito infert, praescientiae ac praedespositionis necessitatem aliam non esse nisi quæ principium contradictionis consequatur: id quod sit, quatenus sit, simul non esse non posse, similemque rationem esse necessitatæ Divinæ praescientiae et humanæ visionis. „Contingens referunt ad Divinam cognitionem,” inquit de ver. q. 2. art. 12. ad 2., „secundum quod ponitur esse in rerum natura; *ex quo autem est, non potest non esse tunc, quando est:* quia quod est, necesse est esse, quando est, ut in primo Perihermenias dicitur. Non tamen sequitur, quod simpliciter dicatur necessarium nec quod scientia Dei fallatur; sicut et visus meus non fallitur, dum video Petrum sedere, quamvis hoc sit contingens.” Pergit autem sic (ad 3.): „Contingens pro tanto dicitur necessarium esse, secundum quod est scitum a Deo, quia scitur ab eo, secundum quod est iam præsens, non secundum quod futurum est. Nec ex hoc aliquam necessitatem sortitur, ut possit dici, quod necessario eveniet. Eventus enim non est, nisi eius, quod futurum est, quia *id quod iam est*, non potest ulterius eve-

nire, sed verum est id evenisse et hoc est necessarium.” Porro (in fine ad 7.): „Quamvis,” inquit, „res in seipsa sit futura, tamen secundum modum cognoscens est *præsens*, et ideo magis esset dicendum, si Deus scit aliquid, *illud est*, quam hoc erit. Unde idem est iudicium de ista: Si Deus scit aliquid, hoc erit; et de hac: *Si ego video Socratem currere, Socrates currit:* quorum utrumque est *necessarium, dum est.*” Item I. q. 14. art. 13. ad 2.: „Si dicam: si Deus scivit aliquid, illud erit, consequens intelligendum est, prout subest Divinæ scientiae, scilicet, prout est *in sua præsentialitate;* et sic necessarium est, sicut antecedens, quia *omne, quod est, dum est, necesse est esse.*” De malo q. 16. art. 7. ad 15: ita scribit: „Sicut se habet Divina scientia ad futura contingentia, sic se habet oculus noster ad contingentia, quae *in præsenti sunt.* Unde sicut certissime videmus *Socratem sedere, cum sedet,* nec tamen propter hoc sequitur, quod sit simpliciter necessarium: ita etiam ex hoc quod Deus videt omnia, quae eveniunt, in seipsis, non tollitur contingentia rerum.” Denique ille sic disputat (I. contra gent. cap. 67. versus finem): „Si unumquodque cognoscitur a Deo sicut *præsentialiter visum,* sic necessarium erit esse, quod Deus cognoscit, sicut necessarium est *Socratem sedere, ex hoc quod videtur sedere.* Hoc autem non est necessarium absolute, vel ut a quibusdam dicitur, necessitate consequentis, sed sub conditione, vel necessitate consequentiae. Haec enim conditionalis est necessaria: *si Socrates videtur sedere, Socrates sedet.*” Idem autem affirmat in extrema illi epistola, quae nuper reperta est, quam paulo antequam mortuus est ad monachos Cassinienses misit: „Manifestum est autem, quod ex hoc, quod video aliquem sedere, nulla ingeritur ei necessitas sessionis. Impossibile est haec duo simul esse vera, quod *videam aliquem sedentem, et ipse non sedeat;* et similiter non est possibile, quod Deus præsciat aliquid esse futurum, et illud non sit, nec tamen propter hoc futura ex necessitate eveniunt.” Iam vero, quia S. Thomas prævisionem antecedere doceat Dei praedestinationem eaque *inclusi*, huius quoque necessitas prorsus eadem sit oportet, quam modo explicavimus. Dicit igitur (in I. dist. 40. q. 3. in fine corporis): „*Adaequatio ista attenditur scientiae Dei ad rem, non secundum quod est in causa suis, in quibus est ut possibile futurum tantum, sed ad ipsam rem, secundum quod habet esse determinatum, prout est præsens, et non futurum: et ita patet, quod certitudo praedestinationis nullam necessitatem salvandis imponit.*” Porro (de veritate q. 6. art. 3.): „Praedestinatio includit praescientiam . . . sed

praesentia habet certitudinem . . . ergo et praedestinatio. (Ad 6.) . . . Veritas praedestinationis et praesentiae respicit futurum, ut est *praesens* . . . et ideo certitudinem habet.<sup>4</sup> Ergo plurimis S. Thomae locis discimus, praesentiae ac praedeterminationis necessitatem hae denique ratione totam verti, quod id, quod sit, non possit idem simul non esse. Quod quidem non Bannesianorum, sed nostrae sententiae congruit, quemadmodum et alibi et supra p. 28. et 29. demonstravimus.

10. Postremo argumentum adiungere placet, quod superiora complectatur. Dogma fidei est, voluntatem gratia efficaci motam nulla adactam necessitate actum meritorum efficere (I. prop. Iansemii). Necessitas quid est? Respondet S. Thomas eo ipso loco (de verit. q. 22. a. 6. et 7.), quo quaerit, num voluntas necessario agat et capax sit meriti: „Necessarium dicitur,” inquit, „quod immutabiliter ad unum determinatum est” (art. 6. in corp.). Iam vero praedeterminatione *immutabiliter determinari* hominem idque ad *unum illum actum*, ad quem efficiendum datur, ipsi Bannesiani non negant (vide supra p. 13. n. 1. 2., p. 14. n. 1.); et videtur manifestum, quum fieri nullo modo possit, ut voluntas praedeterminata revera omittat actum. Consequitur igitur secundum S. Thomae definitionem vera ac talis necessitas, quae tollat libertatem. Quodsi ea definitio ex alii locis eiusdem Doctoris (contra gent. lib. 2. cap. 27.; de verit. q. 6. art. 3. ad 8.; Summ. I. q. 14. art. 13. ad 3.) ita a theologis circumscrribitur, ut necessitas sit *anteceps, intrinseca et immutabilis determinata ad unum*: ne sic quidem praedeterminationis physica expers esse necessitatibus videtur. Annon actum ut causa *antevertit* et homini *intrinsecus* inhaeret? Ergo nec *necessitate* secundum S. Thomam nec *praedeterminatione* voluntas propellitur.

Quod praeclarae congruit cum regula diiudicandae naturae actuum voluntatum a S. Thoma proposita: eatenus esse aliquid simpliciter, quatenus sit *in actu* („Unumquodque simpliciter esse dicitur, secundum quod est in actu”, I. II. q. 6. a. 6.). Ergo etiam, liberne sit motus voluntatis an necessarius simpliciter, ut appareat, videndum est, qualis sit in actu. Sed ita praedeterminationem necessario consequitur, quia ea praesente ipse actus non fieri nullo modo potest. Est igitur actus voluntatis, si Bannesianorum rationes ex S. Thoma metimur, necessarius simpliciter.

Confirmat argumentationem nostram id, quod S. Thomas de origine et de effectu necessitatis disserit.

Docet *generativi*: „Movens tunc ex necessitate causat motum

in mobili, quando potestas movens excedit mobile, ita quod tota eius possibilis moventi subdatur<sup>4</sup> (I. q. 82. a. 2. ad 2.). Id quadrare in gratiam efficacem Bannesianorum perspicuum esse nec ipsos infirmari posse videtur; ex magnitudine enim potentiae Divinae, cuius instrumentum gratia vi omnibus voluntatis viribus multo superiore operetur, explicant, cur gratia efficax effectum non possit non certissime sequi. Ut Alvarez (de aux. div. gr. 1. 9. disp. 83. n. 8. ed. Lugd. 1611. p. 665.) scribit: „Quando agens infinitae virtutis movet aliquod subiectum, tale subiectum infallibiliter movetur, quia tunc resistentia passi non superat nec adaequat virtutem agentis.” Ergo praedeterminatione Bannesianae — si superiora S. Thomae verba in eam transferuntur — veram gignit iustumque necessitatem nec consistere cum libertate potest. Re quidem vera ita hoc ignoravit S. Thomas, gratiam ob insitam invictamque virtutem infallibiliter operari, ut efficaciam gratiae sic explicet: „Vocatio, qua trahitur praedestinatus, nihil est aliud quam quidam mentis *instinctus*, et haec *vocatio* in praedestinatis est *efficax*, quia huiusmodi *vocationis assentiunt* (in ep. ad Rom. c. 8.).

Qui effectus sit quodque indicium verarum necessitatis, D. Thomas exponit I. q. 82. art. 1. Ut distinguatur contingentia a naturae necessitate, hoc affert indicium: quod contingens sit, id aliquid non futurum. Efficit autem vis ac natura physicae praedeterminationis, ut *nunquam actus careat*; non est igitur contingens actus — obstat enim ipsa virtus praedeterminationis, cuius effectus in innumerabili multitudine *nunquam est non futurus* —, sed necessarius; immunitas autem a necessitate propria est meriti culpaeque conditio, idque a nullo nisi haeretico negari docet S. Thomas cum omnibus Bannesianis.

#### 4. De vetere schola S. Thomae.

Explicata ipsis S. Thomae doctrina, videamus, quam arcta vetus eius schola ante Bannesium vestigiis institerit magistri. Principium ducimus a magno illo Thomae discipulo, *Aegidio Romano*, Ordinis S. Augustini priore generali. Is in commentario suo copiose disputat, qua ratione Deus hominem preaparet ad iustificationem, quae Divinae motiones necessario requirantur: de praedeterminatione physica tacet nec aliam gratiam praevenientem praeter excitantem commemorat. Sic enim inter alia scribit: „Visa convenientia et differentia gratiae ad naturam, volumus ex his procedere ad solutionem quæstionis propositæ. Dicemus ergo, quod sicut non introducitur forma naturalis, nisi agens naturale primo moveat et disponat materiam ad ipsum: sic quia gratia est quid supernaturale, numquam infundat animam, nisi agens supernaturale, quod est Deus, moveat et impellat animam ad susceptionem gratiae, ut declaratum est ex convenientia gratiae ad naturam. Iste autem impulsus et iste motus divinus ad gratiam sunt compunctiones et bonae cogitationes, quas immittit Deus peccatori non converso, ut convertatur ad ipsum; et quas immittit Deus converso, ut magis convertatur ad eum. Immissiones autem istae possunt diei divina pulsatio et divina statio ad ostium cordis pulsans, ut homo convertatur ad ipsum et aperiat sibi ianuam, ut Deus intret in ipsum et infundat sibi gratiam; vel istae immissiones bonarum cogitationum possunt dici divina vocatio, qua Deus vocat nos intrinsecus, ut sequamur ipsam et recipiamus gratiam, de qua vocacione potest exponi illud Prophetæ: „Audiam, quid loquatur in me Dominus Deus, quoniam loquitur pacem in plebem suam,” id est, in me et in aliis sibi subiectis. Nam ista vocatio non est nisi ad pacem, ut corpus sit subiectum animæ, et anima Deo, et omnia sint pacificata. Sic ergo ante omnia præcedit huiusmodi divinus impetus, in quo aliquo modo conveniat gratia cum natura. Verum . . . quando Deus sic immittit nobis cogitationes bonas et sic vocat nos per eas, in

potestate nostra est velle sequi ipsum vel non sequi. Et si sequamur ipsum, infunditur nobis gratia; si non, excludimur ab ea; ergo ad infusionem gratiae primo præcedit divina vocatio vel divinarum cogitationum immissio, postea sequitur liberi arbitrii ad Deum conversio et postea gratiae infusio. (In 2<sup>dam</sup> lib. Sententiarum. Cordubae 1707. dist. 26. q. 11. art. 3. p. 449. col. B.)

Neque magis in ordine naturali physica prædeterminatione utitur; docet enim 2. dist. 1. p. 1. q. 2. art. 6. § *Pro securis*, eundem esse in omni causarum genere ipsum generalem Dei concursum, sed recipi diverse pro cuiusque causa natura. Idem summa perspicuitate enuntiat, ad *primum* actum indeliberatum voluntatem a Deo determinari, tum ad liberos actus se ipsum movere. „Respectu ergo finis,” inquit, „et eius quod apprehendit sub omni ratione boni, voluntas determinatae moveatur nec seipsam determinatur.” (Quodlib., Lovan. 1646. p. 178. col. B.) Porro: „Voluntas ergo si non necessitatibus ab his quae sunt ad finem et si ea quae sunt ad finem, non possunt determinatae movere voluntatem, oportet quod voluntas determinet seipsam ad hoc ut moveatur ab his, quae sunt ad finem.” (L. c. p. 177. col. B.)

Infallibilem gratiae efficaciam a Dei prævisione repetit: ita coniuxisse inter se atque accommodasse Deum causas contingentes, ut non sequi non possit effectus (de haec sententia supra p. 79):

„Simul ergo cum necessitate oportet nos salvare contingit et cum certitudine liberum eventum.”

„Notandum quod dicere possumus divinam prædestinationem tripliciter certam esse. Primo ex præscientia quam præsupponit. Nam secundum Aug. in „De prædestinatione Sanctorum” prædestination sine præscientia esse non potest. Secundo ex ordine causarum secundum quem est executio eius. Tertio ex numero prædestinatorum qui est Deo notus. Primum sic ostenditur, quia eo ipso enim quod divina præscientia falli non potest, et quae sunt a Deo præscita vel prævia esse esteren, prædestination, quae divinam præscientiam præsupponit, certitudinem habet: sed huic certitudini libertas arbitrii non repugnat.. Secundo prædestination certitudinem habet ex ordine causarum. Nam siue Deus ab aeterno prævidit hunc salvandum, sic iste salvabitur; unde omnes illæ causæ concurrunt ad salutem huius, quas Deus ab aeterno concurrens vidit, et est ibi totus ille ordo causarum, qui ab aeterno est a Deo prævisus, quae omnes causæ simul sumptae quadam necessitate effectum inferunt; sed propter talem necessitatem vel certitudinem non tollitur libertas arbitrii, cum ipsum